



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



Centre sorkari Covid-19 data mimshir: Priyanka Gandhi Vadra

Suu Kyi anema benokba aliba ken o tem taruba hopta nungi angadangsü



VOL. XVIII NO. 234 (ADOK 234) DIMAPUR

SANGTENNÜ (TUESDAY)

AAMI (JUNE) 08, 2021

₹ 5.00

Home Department-i COVID-19 vaccine magirtem jangjar

Dimapur, June 7, 2021 (TYO): Home Department-i Department ajak nung tekolakpurtem dang COVID-19 magiba ketdangsür aser staff tenüng agütsütsü metetdaksüo.

Iba nung Nagaland Civil Secretariat Complex, Kohima nung aliba NIC, CSO, NCCD,

SBI, BSNL aser Post Office dena lir.

Department tekolakpurtemi June 8, 2021 tashi nung Home Department nem hard copy m e s ü r a homedepartmentgab1@gmail.com dangi email ajanga osang sangoktsütsü tetuyuba agütsüo.

H&FW-i COVID vaccine maparen tuluba inyaktsü

Dimapur, June 7, 2021 (TYO): June 8 nungi 18, 2021 tashi Department of Health & Family Welfare-i COVID vaccine agütsüba maparen tuluba nung inyaktsü.

Iba mapang Hombar nungi Hokolbar tashi urban colony aser yimtsüngtem nung aliba health facility aser outreach session site ajak nung vaccine agütsütsü.

Iba mapang arishi küm 18 aser 44 tsüngda alirtem aser arishi küm 45 ser temapur ajaki COVISHIELD agütsü maongka ajangzüksü mepishir, Pie yim/colony nung vaccine

agütsü atema village / Panchayat Chairman/ MO i/c, ANM, ASHA, Anganwadi den tongteptsü akok. Iba dakji alia District ketdangsürtemi online registration aser booking indang sangokja aliba dak alia tang session site ajak nung 'on-site registration & vaccination' asütsü, ta Health & Family Welfare Department-i ashi.

Matamabensartemia pei pei tesem nung aliba Health Workers den osang tongtepa vaccine agütsü mepishir. Vaccine agütsüpur ajaki COVID inyakym sülen anidaksü metetdaksür, ta Department-isa ashi.

Dimapur nung tanü nungi Hardware dokan lapoktsü

Dimapur, June 07 (TYO) : Nüboritem mapa inyak mathitsü atema Dimapur nung Hardware Merchants' Association purtemi mepishia ama, June 8 Mongolbar nü nungi anogo kaka thia thia hardware dokan ajak anepdang 6:00 ako nungi anüngdang 12 ako tashi lapoktsü Dimapur Deputy Commissioneri temelaba agütsüo.

Anungji, tang nungi Dimapur nung Hardware dokanem hopta nung anogo asem Mongolbar, Brehostibar aser Honibar nü anepdang 6:00 ako nungi anüngdang 12:00 ako tashui lapoktsü aser iba mapang dokan kiburtem ajaki tashidak memenateptsüsa tim teinyaktsü ajak beshitsüla ta Dimapur DC Wb. Rajesh Soundararajani metetdaksüo.

Mkg nung tanü nungi gari number melentepa senzütsü

Mkg, June 07 (TYO): Mokokchung town nung Covid-19 tashidak wara nokdangba sentong akangshitsü atema June 8 nungi 11 tashi gari number tatembangba odd aser even number melentepa senzüdaksütsü telemtetba agiogo.

Anungji, June 8 aser 10 nü koba gari numbersa 0,2,4,6,8 agi tembanga lir, item garitemji dang Mokokchung Municipal area nung senzütettsü aser June 9 aser 11 nü koba garitemsa tatembangba number 1,3,5,7,9 agi tembanga lir itemji senzütettsü.

Iba kasa ozüng yagi tanga district len nungi aruba garitema alentsü. Ajisiaka, nüboritem asoshi taküm nüngdakba jangotsü aser osettsüset abenba garitem aser rongdak nüngdak asoshi temelaba bener aruba garitemba ajanga süidaksütsü.

Ano, Covid-19 aser medical maparen nung jajaritemba iba ozüng küboki maittsü. Iba ozüng raksartem dang Motor Vehicle Act, 1988 nung aliba ama senchi sen achitsü ta tanü sangdong ka nung Mokokchung DC Wb. Limawabang Jamiri metetdaksüo.

Anogo ana atongtepa totzü jenjang tuogo

New Delhi, June 7, 2021 (Agencies): Hombarnü totzü company temi petrol aser diesel jenjang tuogo.

Tanü New Delhi nung petrol litre nung poisa 28 aser diesel nung poisa 27 ajungketa liasü.

Jenang atuba sülen Delhi nung petrol litre nung Rs 95.31 aser diesel litre nung Rs 86.22 kümogo. Maneni, Mumbai nung petrol litre nung Rs 101.52 aser diesel nung Rs 93.58 kümogo, ta Indian Oil Corporation

(IOC) ajanga metetdaksü.

May 4, 2021 nungi tenzüker totzü jenjang 21 ben tuogo. May 4 nungi tenzüker tanü tashi nung Delhi nung petrol litre nung Rs 4.76 aser diesel litre nung Rs 5.31 ajungketogo.

Bharat Petroleum Corporation Ltd (BPCL), Indian Oil Corporation Ltd (IOCL) aser Hindustan Petroleum Corporation Ltd (HPCL)-i anogoshia totzü jenjang reprangshimer.

Jun 21 nungi Centre-i Covid vaccine angati agütsütsü: PM Modi

New Delhi, June 7, 2021 (Agencies): Centre-i state sorkartem dang nungi vaccine agütsüba maparen benzüksü aser June 21 nungi Covid-19 vaccine angati agütsütsü, ta Prime Minister Narendra Modi-i Hombarnü metetdaksü.

"June 21 (International Day of Yoga) nungi arishi küm 18 ser temapur ajak nem vaccine angati agütsütsü telemtetba agiogo" ta PM Modi-i ashi.

Centre-i company tem dang nungi vaccine 75% alizüksüba den state tem lemzüka 25% indang sen agütsür state sorkartem nem angati agütsütsü, ta pai ashi.

"Iba inyakym ya taruba hopta ana tsüngda tenzüksü. Hopta ana nungji Centre aser state sorkartemi tetuyuba tasentem nung aliba ama

sentong renemtsü" ta Modi-isa metetdaksü.

"State sorkartemi vaccine nung sen meindoktsü. Linük nung nisung crore aikati vaccine angati nguogo aser tang iba nung arishi küm 18 ser temapurtem adentsü" ta paisa ashi.

"Sensaker mesüra takar süang, Centre sorkar maparen kübok nisung ajaki vaccine angati angütsü" ta Prime Minister Modi-isa metetdaksü.

Nija mozü kitemi maneni vaccine 25% alizüksü akok saka parnoki dose ka nung Rs 150 dang agütsüla ta Modi-isa ashi.

"Nija mozü kitem asoshi vaccine sen 75% ji Centre-i agütsütsü aser 25% nija mozü kitemi agütsütsü, saka dose ka nung Rs 150 dak tema magütsüla" ta paisa shisem.

DIWALI TASHI RATION ANGATIAGÜTSÜTSÜ:

"India nunger sensaker nisung crore 80 shi ka taküm Diwali tashi ration angati angütsü" ta Narendra Modi-isa tanü metetdaksü.

Iba ya Pradhan Mantri Garib Kalyan Yojana kübok inyakba mapa ka lir.

"Iba wara nung sorkar sensaker den lir. Asen nütüüng yongsük nung nisung crore 80 tema taküm November ita tashi ration angati angütsü. Nisung shinga yaseta memejangtsü" ta Modi-i ashi.

COVID-19 wara mapang sensaker nisung crore 80 shi ka nem Rs 1.5 lakh crore alang ration angati agütsütsü ta October 2020 nung PM Modi-i mezüng metetdakja liasü.

COVID-19 Nagaland: Puteteritem dang nungibo taneptsü angur timba

Kohima, June 7, 2021 (TYO): Nagaland nung tanü agi anogo anabuba COVID-19 puteter dang nungibo taneptsü angur timba liasü.

Hombarnü COVID-19 puteta alir nisung 169 tashi taneptsü angur aser 145 dak putet.

Tanü COVID-19 puteteritem züngsema nisung ajak agi 22,918 kümogo aser nisung asem asüba züngsema tasür ajak agi 429 kümogo.

"Tanü nisung 145 dak COVID-19 putet. Parnokji Mokokchung nung 40, Tuensang nung 36, Dimapur nung 31, Kohima nung 23, Mon nung 5, Wokha nung 4, Longleng o Tuensang nung anana (2) aser Peren o Phek nung kaka (3)" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü COVID-19 puteta alir nisung 169 tashi

taneptsü angur. Parnokji Dimapur nung 108, Kiphire o Kohima nung tertrokrok (16), Mokokchung nung 15, Peren o Zunheboto nung pezüzü (4), Phek nung 3, Wokha nung 2 aser Longleng nung 1 lir" ta paisa ashi.

Iba ajanga Nagaland nung COVID-19 nungi nisung 17,143 taneptsü nguogo aser ibaji 74.80% lir. Tang nisung 4,703 anepaludar, ta Dr Kikon-isa ashi.

"Tang anepalurtem rongnung nisung 235 dak shirangba yimya terara lir, 61 tera shiranga oxygen agir, 34 kanga shiranga oxygen agir, 16 ventilator medeni ICU nung aser 8 ventilator nung lir. Nisung 4,349 dakbo shirangba yimya kecha mali" ta paisa shisem.

Hombarnü Dimapur, Kohima aser Phek nung COVID-19 puteta alir nisung kaka asüba züngsema tasür ajak agi nisung 429 kümogo saka nisung 14 bo tanga tashidak ajanga asü.

"Nagaland nung COVID-19

alitsü akok ta temolung melemi bilemba sample 2,00,370 tendangogo. RT-PCR ajanga 92,154, TrueNat ajanga 57,096 aser Rapid Antigen Test ajanga 51,120 tendang" ta Dr Kikon-isa metetdaksü.

"Deobar tashi nung Nagaland nung nisung 2,34,440 nem COVID-19 vaccine indang dose 2,88,674 agütsüo," ta State Immunization Officer, Dr Ritu Thurr-i metetdaksü.

Vaccine agirtem rongnung frontline workers 58,849, healthcare workers 15,598, arishi küm 45 ser temapur 1,24,296 aser arishi küm 18 nungi 44 tsüngda alir 35,697 lir, ta pai ashi.

"Vaccine agirtem rongnungi nisung 54,234-i dose anaprong agiogo. Parnokji frontline workers 28,025, healthcare workers 10,199 aser arishi küm 45 ser temapur 16,010 lir," ta Dr Thurr-isa metetdaksü.

Co-WIN nung UDID card amshitsü: Centre

New Delhi, June 7, 2021 (Agencies): Matamabensar nem COVID-19 vaccine timi agütsütsü atema Centre-i Co-WIN platform nung tenüng agütsütsü atema Unique Disability Identification (UDID) Card dendaksütsü telemtetba agiogo.

"Centre-i vaccine agütsüba maparen tajungba nung aser tiptema inyaktsü meranger. Iba tangatetba nung ajemdaker

Union Ministry of Health-i State/Union Territory sorkartem dangi Co-WIN 2.0 nung tenüng zülüoktsü atema Photo ID ama Unique Disability Identification (UDID) Card agizüksü tetuyuba agütsüo" ta Ministry of Health & Family Welfare-i metetdaksü.

State aser Union Territory sorkartemi COVID vaccine agütsütsü atema UDID card agizüksü metetdaksüo, ta

parnoki ashi.

March 2, 2021 nü Centre-i tetuyuba agütsüba nung Co-WIN nung tenüng zülüoktsü atema Photo ID 7 amshitsü shia liasü aser tanü nungi iba nung UDID card bendenlokogo.

Co-WIN digital platform nung tang tamshidak Photo ID temji- Aadhaar Card, Driving License, PAN Card, Passport, Pension Passbook, NPR Smart Card aser Voter ID Card lir.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembang mask temerük agiang;



Tangar den tsüktepa tenokdak aser temen;



Teti sapon agi teka metsükang.



Y. Patton-i Dimapur nung osangbener nem teyari agütsü



Deputy Chief Minister Y.Patton-i June 7, 2021 nü DPRO Dimapur matsüngdang Dimapur nung osangbener nem COVID-19 nungi jenbua aitsü osettem agütsüba mapang tangokba noksa ka yangi angur.

Dimapur, Aami/June 07 (TYO): Deputy Chief Minister, aser Home aser Road & Bridges indang Minister incharge, Y.Patton ajanga June 7, 2021 nü Ikishe, Dimapur nung par kidang Dimapur Press Club aser DPRO Dimapur nem N-95 mask, hand sanitizer, hand gloves aser senotsü teyari agüja liasü.

Tensa ajunga nung

nüburtem ajangzüksü atema mapang shidak nung osangbener nem teyari agütsüba mapang tangokba noksa ka yangi angur. Osangbener ya frontline worker tongtipang ka lir, anungji teyari nungdak dang mashi mapang asüngdangang, ta pai osangbener dang ashi.

Dimapur nung osangbener tenüng nung jembiba mapang,

Y.Patton-i maneni osangbener dang temeim sayuba aser süoki ia bilemtsüba atema Dimapur Press Club tir, Filip-i pelaba lemsatep aser nüburtem ajangzüksü asoshi tongtipang aser shidakba osang maneni prokshitsü ashi.

Iba sentong nung DPRO Dimapur den Dimapur Press Club nungi ketdangpurtem dena liasü.

Longleng nung 69 buba Phom Day mungogo

Dimapur, Aami/June 07 (TYO): Phom Day ya anogo balaka lir, koba Phom nungrtemi küm shia June 6 nung amunger. Phom Day ya 1952 küm June 6 nü Asür Hamneyi aser Asür Yongtau na den yimtsüng balala nungi Phom nunger tashi-temeteter temi anir amung tenzüka liasü.

Iba anogo nung parnoki nisung tekolak tangzüka aser dangar yimtsüngtem amakba anentsü nangzük, anungji Phom lima nung tekolak bushiba yimsü tatem kati arua putu tasen ka tenzüka liasü.

Iba anogo Phom nunger lenirtem Longleng Town nung

aliba Phom Day Pledge Declaration site nung adenshia Phom People's Council (PPC) tir M. Shami Angh ya tetushi tesemdanger ka ama COVID-19 SOP tem amshia munga liasü.

Iba sentong nung jembiba mapang, M. Shami Angh-i ashiba agi, asen otsüla-oboula nungeri shisa kaa tekolak bushiba anentsü telemtetba agi aser lokti aintsü aser terenlok atema yimjung shimtetba atema Phom Day ya amunger.

Parnoki yimjung ngutetba ajanga tanü asenok yimjung aser tesunep nung alir, ta pai ashi.

Pai nüburtem dang lokti nung

yimjung lidaktsütsü aser nübur ajangzüksü atema mapa tajung inyaktüsü ayongzüka liasü.

Shami Angh-i lanur tashi temeteter dang yakbangi arua bendanga agütsür temeim nung lokti anitsü ayongzüka liasü.

Paisa nüburtem dang tangatetba tajung nung COVID-19 tashidak wara den pei khuret ama angateta raratsü aser kasa mapang COVID-19 protocol aser SOP tem sülen anidaktsü ajungshi.

Iba sentong nung paisa health worker, frontline worker aser tashidak wara den raraba nung anibelem mesasai inyakba atema pelaba lemsatepa liasü.



Minister, PWD (Mechanical & Housing) aser Chairman, Mokochung District Planning & Development Board, Tongpang Ozukum-i Medical, Police aser district administration nungi ketdangsürtem den külemi June 06, 2021 nü IMDH, Mokochung nung aliba PSA Oxygen Plant semdanga liasü. Iba sülen pai Fazl Ali College Campus semdang aser ano Impur Christian Hospital semdanga yangji ABAM ketdangsür aser mozüki ketdangsür den COVID-19 tashidak asoshi renemshia aliba indang jembishinüa liasü. Minister Tongpang Ozukum-i June 7, 2021 nü Mokochung District Task Force Covid-19 senden nunga dena liasü.

NSCN (R) ajanga Maj. (Retd.) Joseph Anal asükhulemsatep

Dimapur, Aami/June 07 (TYO): Tia maka Guwahati nung June 7, 2021 nü Maj.(Retd.) Joseph Anal, ACL (Advisor to the Collective Leadership) asüba atema NSCN/GPRN (Reformation) indang MIP (Ministry of Information & Publicity) ajanga asükhulemsatepa liasü.

Chandel district kübok Ransom Village (Amamcht Region) nungi Shungam Anal'er jabaso asür Joseph ya Naga National Leader tejentem rongnung ka liasü.

1963 küm asosang Asür Joseph ya arishi küm 18 tain lia NNM (Naga National Movement) nung 1981 küm aden aser jenjang balala nung linük küm 40 dak tema tenzüka pa tangola tatembang tashi Naga nunger asoshi nokdaka

liasü, ta sangdong ajanga ashi. Pai bendanga agütsür nendaka inyakba aser junga ketdangsüba ajanga pa ya NSCN indang hierarchal order tematiba nung ACL (Advisor to the Collective Leadership) ama züngsemaktsü.

Pa ya osü tanük süaka takum bendanga agütsür linük meimer aser mapa nungloktsüba teti molungsoa agizüka inyaka aru.

Pa asüba ajanga asen asoshi nübu tejen, tasü tait lenir ka samaogo aser pa asüba ajanga tawa adokdaksüba asüngtsü kanga tasak alitsü, ta ashi.

Asür tanüla teti tatem maka tesunep nung anisüngzükjang aser mangyimer kibong nem anisüngzük aser tesunep agüjang ta NSCN (R) ajanga Tsüngrem dang sarasademer, ta sangdong ajangasa ashi.

MGNREGA kübok World Environment Day mungogo

Dimapur, Aami/June 07 (TYO): Rural Development Department lenisüba nung June 05, 2021 nü MGNREGA kübok VDBs ajaki World Environment Day nung süngdong tema liasü.

Iba anogomung nung Commissioner, MGNREGA Neposo Theluo, IAS ajanga yimtsüng ajak nung libajen aser nübur rongsenketsüng ajangzüksü atema süngjang atangba süngdong tema World Environment Day amungtsü totuyuba agüja liasü.

Ecosystem tanaben yanglushitsü asoshi asenoki inyaktettsü tajungtiba agi süngdong atemtsüba ya lir. Aser nüburtemi shilem agia süngdong atemba ajanga dang iba nükjidong ataloktsü, kechiaser tang financial year atema MGNREGA nung süngdong atemtsü atema Labour Budget lir, ta pai ashi.

Ibai Peoples Movement ka ama senotsü meindoki ayongzükettsü, ta paisa shia liasü.



PHED Minister, Jacob Zhimomi-i June 7, 2021 nü District Hospital Dimapur nem portable high frequency diagnostic X-ray machine ana tenla agüja liasü. Iba machine ya Deputy Commissioner, Dimapur, Rajesh Soundararajan IAS aser Deputy Chief Medical Officer, Dr. Antoly Suu na nem amokja liasü.

Mkg. Municipal kübok aonsotsü jenjang melenshitsü

Dimapur, Aami/June 07 (TYO): Mokochung Municipal tawabangba kübok aonsotsü jenjang melenshitsür, ta ADC & Administrator, Mokochung Municipal Council, Shashank Pratap Singh, IAS ajanga

sangdong ka nung metetdaksü. Dokan kiburtem dang iba jenjang nung aonsotsü ayoktsü totuyuba agütsüogo, aser aibelener nem temerenshi agütsütsü, ta sangdong ajanga ashi.

Mokochung Municipal kübok aonsotsü jenjang yamai alitsü:

- | | | |
|-----------------------|---|-------------------|
| 1. Tomato | - | Rs. 40/- per Kg |
| 2. Potato | - | Rs. 30/- per Kg |
| 3. Green Chilly | - | Rs. 60/- per Kg |
| 4. Dry Chilly (Assam) | - | Rs. 250/- per Kg |
| 5. Dry Chilly (Local) | - | Rs. 250/- per Kg |
| 6. Long beans | - | Rs. 50/- per Kg |
| 7. Ladies finger | - | Rs. 40/- per Kg |
| 8. Garlic | - | Rs. 170/- per Kg |
| 9. Cabbage | - | Rs. 35/- per Kg |
| 10. Bitter gourd | - | Rs. 50/- per Kg |
| 11. Carrot | - | Rs. 60/- per Kg |
| 12. Onion | - | Rs. 45/- per Kg |
| 13. Lemon (Long) | - | Rs. 5/- per piece |
| 14. Lemon (round) | - | Rs.200/- per Kg |

Sorkari 'Syndicate Raj' memelatsü: CM Biplab Deb



Agartala, June 7, 2021 (Agencies): Tripura Chief Minister Biplab Deb-i state telongtet nung 'Syndicate Raj' maparen kecha memelatsü ta metetdaksüo.

"Tripura nung alir nüburtim pela lidaktsütsü atema, tang yimsüsüa aliba state sorkari ochishishia inyaka arudar," ta Deb-i ashi. Pai Jirania sub-division nung Madhab Bari Inter-State Truck Terminus aser Jirania Railway Yard semdangba mapang iba osang metetdaksü.

Tesem ana nung maparen achaayangba dak sendakba nung nüburtim ashishitepba Tripura sorkari angashiogo, ta paisa ashi.

Tim telok aser tentettem den sensaksema, inter-state truck

terminus aser freight transport indang maparen ochishishia inyaktsü asoshi Tripura sorkari tang nungi tenzüka khuret ajak abentsü, ta CM Deb-isa metetdaksü.

Madhab Bari Inter-State Truck Terminus aser Jirania Railway Yard maparen dak sendakba nung Chief Minister-i State Transport Minister aser tim ketdangsürtem dang nüngdakba tetuyuba agütsüo.

Deb-i anir Jirania sub-division kübok Madhab Bari Inter-State Truck Terminus nung administrative senden ka ayonga agiogo.

Iba senden agiba mapang Deb-i iba tesem ana nung maparen achaayanga inyakba indang ketdangsürtem dang asüngdanga liasü.

Kasa senden nung State Transport Minister aser ketdangsürtemi inter-state truck terminus aser osettsüsettem belenba indang maparentem Chief Minister dang tongmelang agi metetdaksü.

"Tang ama corona tensa ka nung, transport wadang nung inyakerteri mepetmesü balala ajurur aser parnok kecha nunga tatongokdak maka akümer. Külen, truck kiburtem tasüsa bank instalment agütsüba mapang timtem aika ajurur. Ochimashi maparen melidaktsütsü atema osettsüset belenba maparen nung state sorkari sendaka alirtem, truck driver aser kiburtem dak tenük yoktsü. Ajaki pei maparen nung nendaka aser ochishishia inyaktsüla" ta Deb-i ashi.

Ranjit Barthakur-i Mission Smile chairman mapa agizük

Guwahati, June 7, 2021 (Agencies): Assam nung entrepreneur Ranjit Barthakur-i küm pungo kümsük atema Mission Smile indang chairman inyaktsü.

Ranjit-i Deepak Atal melenzüktsü. Deepak ya Covid19 ajanga taküm samaogo. Ranjit Barthakur ya Smile Asia indang co-chairman ama lir.

Mission Smile dang mezüngbo Operation Smile India ta jaa liasü, iba ya medical charitable trust ka lir. Parnoki India nung tebang mechi chimar aser tejak nung timtem keter asor tanur aser taintem angati surgery agütsütsü asoshi bendanga agüja inyaker.

Cleft Free Assam & North East India mapatong ataloktsütsü atema Assam sorkar aser National Health Mission, Tata Trusts den Mission Smile yagi public-private partnership yangluogo.

India nung Assam ya mezüng 'Cleft Free' state ka akümtsü asoshi ana nung dang lir, ta ketdangsürtemi ashi.

Mahendra Mohan Choudhury Hospital nung Mission Smile indang Guwahati Comprehensive Cleft Care Centre ajanga tesüiba küm 10 nung cleft surgery 20,000 tashi agiogo.

Barthakur ya entrepreneur ka den ang Eastern Himalayas ajunga nung nüburtim anema alibaren,

shisaliok, sobaliba aser lipoküm kümzüka ayutsü asoshi jangrabangra inyakba nisung ka lir.

Balipara Foundation ya pai tentet aser iba nung pa tir inyaker.

2002 nungi 2015 küm tashi strategy, action planning, project formulation, investment initiation aser image building exercise atema Ranjit Barthakur ya Assam chief minister atema Advisor ka ama inyakogo.

Pa ya NaturenomicsTM indang chief architect ka lir aser iba ya Globally Managed Services (GMS) den longjemer tenzüka telok ka lir.

Paisa, Indian Premier League (IPL) nung Chairman ama inyakogo.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga tanepsü mang. Ajisüaka, tang **H. Umar Chesam contact no.8416087414 / 7627998690** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsungda ni tanepsü ngua liasü aser iba sülen tanü tashi kü temang nung timtem kecha mali. **Time: 7 AM - 3 PM -Yours sincerely -Zhubi, Add: Alricy Colony**



Darrang nung vaccine mepiriba ajanga timtem adoker

Guwahati, June 7, 2021 (Agencies): Assam kübok Darrang district nung Covid-19 vaccine peria maliba ajanga taintem atema ayongba special vaccination drive nung tetsükdaktsü ajuruogo.

Iba district nung taintem nem Covid-19 vaccine indang mezüng dose agütsütsü atema June 4, 2021 nü Darrang district administration-i special vaccination drive sentong ayongzüka liasü.

Iba special vaccination drive mapatong kübok health ketdangsürtemi ki tonga oa tantsür-tambur nem vaccine agütsütsü sentong renemer liasü.

District social welfare department ajanga tajangzük angutsüpur tenüngtem agütsü saka vaccine peria maliba ajanga iba drive tom nung anentsüsa aküm.

"Covid-19 vaccination mezüng anogo Mangaldai nung nisung 10 nem mezüng dose agütsüo," ta Additional Deputy Commissioner, Sanjib Borah-i ashi.

"Ajisüaka, tang vaccine peria maliba agi onoki iba maparen anena atar. Iba drive ya taruba hopta tenzüksütsü onoki imlar," ta Borah-isa ashi.

Kasa mapang Mangaldai Nagar Balika LP School kübok amenoka aliba model testing aser vaccination centre nung vaccination session 10 tashi achaayanga agiogo.

District immunization officer, AK Dhing-i ashiba agi, iba district nung Covid-19 vaccine indang dose 1,17,758 tashi agütsüo.

Item rongnung mezüng dose agir 94,518 aser tanabuba dose agir 23, 240 lir.



Aami/June 07, 2021: Tripura nung BJP telok nung inyakerteri opposition lenirtem amokmerenba osang ajanga angazüker. East Agartala kübok Sramajibi Colony nung Sushil Das (abilen) aser par kibongi Covid-19 agi shirangertem nem teyari agütsüba atema, BJP nung inyaker telok kati parnok dak teka ayi aser amokmerena liasü, ta kasa sangdong nung shia lir.

JNIMS nung medical nisungtem dak teka sangshir 2 apu

Imphal, June 7, 2021 (Agencies): Imphal nung aliba Jawaharlal Nehru Institute of Medical Sciences (JNIMS) Hospital nung COVID-19 agi shiranger ka asüba sülen medical mapa inyakerteri dak teka sangshiba atema nisung ana puogo.

Honibarnü Covid-19 agi shiranger ka asüba sülen lar kinungertem JNIMS nung health workers dak teka sangshi aser medical oset kar raksatsü ta osang ajanga ashi.

Manipur police-i tasüla kinungbo aser lar adianu ka apu. Arishi küm 33 tain Okram Gypsy Devi ji May 23 nü JNIMS nung anepalutsü atema

aniok saka la Honibarnü COVID-19 agi asü. Ajisüaka, Devi asüba sülen lar kinungertem doctor tem dak tai tongloksü aser COVID-19 ICU ward raksatsü.

Iba tatalokba ya Indian Medical Association of Manipur State Branch (IMA-MSB)-i khukhua aitsüo.

"Mozü ki nung osettem raksatsüba aser doctor tem dak teka sangshiba ya state atema maaksü ka lir aser medical nisung ajak mezüngmeshir. COVID-19 wara tanabuba agi tonger kangshiba mapang ka nung iba ya atalokba atema sasar" ta IMA-MSB-i metetdaksü.



Hombarnü Mizoram kübok Zote nung HQ 23 Sector Assam Rifles indang Serchhip Battalion-i AK-56 Rifle ka den magazine tazüng 3 aser 9mm pistol ka ngutetba noksa nung angur. (Aizawl, June 7)



TIR YIMYIM

YIMOBILEM (EDITORIAL)

DIMAPUR SANGTENNÜ, AAMI (JUNE) 08, 2021

Kechiba kilir ayur ?

Mapang mapang shia asenok kidang tangar kin chanu bener arua kidang kilir inyakdaksütsü ayuba jena aoba mesüra kanga mejungi meketmeseni temang nunga dena zübo ketja merenshia amshiba otsü angashir aser angur. Idangji, jet ta temulungjangi " kechiba kidang tangar chir anir arua kilir ayur ? " ta tasüngdangba ka arur. Yimya agi kilir ayubaji kidang mapa inyaker meinyakma aliba agi yariteptsü ayur. Aji oda, tanü asüng balaka kibong nung apuani na prongla office nung mapa inyaker aser tanur tasoba temang kaketshidaki aoer, anungji kidang teyariteper nungdaker, iba jagi meyunüyonga kilir ayutsüsa akümer. Ajisüaka, tanü asüng asenok loktiliba nung sobaliba tasen saka tamajung ka reprangtetbaji, kidang kibong nung nungdak menüngdak ta mali, ajaki kilir yuner, kidang kilir melira tamakok tuluka angu ama, tangar dang nümamedangteti bilemba kibong aika lir. Joko, kidang kilir ayuba agi kinungboi paji chuba amai bilemer, anungji kidang temeyonga meküraker, kilir jagi dang anepdang saaker mi aputeta süngo molua agütsütsü, ki aoktsü, ak ajeptsü, an nem janga agütsütsü, soruchioker tanurtem nem chiyongdaksütsü, auso marok shidoktsü, azü nem chi agütsütsü, sü ashitsü, süng asotsü, naro nem tzü agütsütsü, menden ajak meyutsü, kisemi arur nem süngo agütsütsü ta kilir mapaji inyaker meinyakma inyaka alidang, ano nikongdang kasa anepdang inyakba mapatem to inyaksüsa mapang agi atongtsü. Kinungboi bilemba ama kasaji kinungtsü kilir ka yur chubatsür amai bilemer, anungji kidang tangar kisemer arudang lai süngo agütsütsü joko maksü amai bilemer aser kisemer nem kiliri süngo agütsütsü alima nung temaba jenjang tajung ka atong ama pei dang nungi tuluba asüküma bilemer. Item ama jangramatem aser mashikoshi angatetba shisatsü ajanga aiben kilir ayuba agi teyari masü saka yimkong atema maksü aser nungkubentet dang bener aruba tensa tia ajangshiba agi, taoba hopta nung asenoki asenok Aotsür Aor kidang tangar nisung kilir mayu nunga koma süla (?) ta asüba onük nung shisalemsatepogo. Atangji, aikati kilir ayutsütsü kibong aika nung nungdaker saka kokra mayuang tajungba, kechiyong kidang kilir ayuba agi tanurtem ki mapa mangazüker aser ano pei tetsü oshi melen Nagamese dang jembiadoker ta asüba tebilemsütem lemsatepogo. Item ajakji shitak atalokba angur. Tanü lanurtem aika kibong kümer soruchiok mashi, anogo ishika entsü aser maggi meta chir balaba otsü lir. Ano, kibong aika nung tanurtemi pei tsürabur oshi masü saka kilir oshi jembiba agi, pei yimer aser kinunger adianurtem den libaliru mesademi akümba timtem aser takoksa angur. Aji oda, joko ajak asoshi sobaliba amato ka küma adok nungji, nungdak menüngdak aser akok makok kecha mali, pei kidang kinungertema tebok sünga mechiyongdaksütetter nung, ano kilir anir aruji kilirji dena tebok mesüngdaksütet kongradaksüba kibong aika nung angutsü. Ano, asenok kibong aika nung kilir ya azü ak den kasasa amshir, anungji kibur chiyongba jang balaka aser azü, ak aser kilir asoshi jang balaka ta soruba angutsü. Ano, kiburbo teti shi ango den chiyongtsü saka kilirbo dal aser süngolemba den dang chiyongdaksütsü ta asüba kibongtema lir. Ajisüaka, temang atemabo dal aser süngolembajisa tajungba, anungji ki kibur diabetes aser Blood Pressure tashidak tapu balala agi tonger kangshidang, alemli Babylone lima Daniel nunger medemertem amato kilir temangjibo ayangayanger tashidak maket aientsü. Taoba hopta nung yangi shisalemsatepdang, nisung kati ashi ama, asenoki metetsüba kaji kilirji alar masü, anungji kilirji alar ama masü saka Tsüngremi moatsüba teyariteper, pei chir aser pei kinunger ama meima amshitsü tim. Atangji, akok tashi kidang kilir mayu tajungba, kechiyong kidang kilir meyui aseni timtem talilla agia chirnurtem anepaluba nungji tajangzük aser temoatsü tuluba keta alir. Ajisüaka, ayutsüsa kümra, kilirja nisung ama aküm keta alitsüsa meima amshitsüla. Kilirbo ayu saka tula longpant dena malitsütet teshiza aser tapok semer mapa inyakdaksür, kidang kilirtemji dena merükmeju mali, süngo bener arutsüba tekaji dena tesempatsüka asütsüsa lidaksüra, kilir mayuang tajungba. Nisung karibo kilirtemji school zünga tajung kümdaksütsü nangzük arua lidaksür saka kidang lesson sayutsütsü yutsür lesson bushitsü mapanga magütsür. Iba ama kilir mezüngmeshia amshirtemjibo pei chirnurtem dak temoatsü malitsü. Asenok aika pei kidang kilir ayutsütsü masü, anungji akok tashi kidang apuani na prongla mapa inyaker ka mesüra kilirbo meyuli aser ayuyonga asen chirnurtema kilir denji külem külemi ki mapa inyaksüsa kibong nung inyakyim sobaliba ka tenzükdi. Ano, tang ama alima tashidak wara den raradang asenbo kanga kümdanger saka kilirbo mashimashi yutsür ta asüba kanga tamashi, kechiyong asen shirangba dang nungjibo kilir shirangbajisa asenok atema timtatamba asütsü.

OLEMSABANG

KHRISTAN KIBONG NUNG KILIR KODA AYUTSÜ ASER ANEBALUTSÜ?

~ Ms. Sashikümla Longkümer

(Yashi adok nungi...)

Kilir ayuba ajanga teraksa

Aor aikati kilir ayubaji konang, takar ta sayur amai bilemer. Hai mini, kanja ta tangari tenzükdaksütsü asüküma bilemer. Tanur nem kecha mapa meinyakdaksütsü mini-kanja yur tenzükdaksütsü jangratemtsüka amai bilemer, saka kilir dak metaloker aliba kibong nungji timtem aika ajurutsü aser ngua arudaki. Kar yamai shiner:

- * Tanuri sorochiok mesütetsü, kibong kar nungbo süngo meyanglutetba tanur lir.
- * Tsürabur aikati kilir ayubaji chirnur anisüngzük asoshi ta bilemer, saka kibong nung jala jabsotemi mapa mashibaji lendong. Iba jagi azümesen tentetdaksür. Pei chir alar jenjangi yoker ta tsüraburi metetsüla.
- * Chirnur nungi dignity of labour samar.
- * Tangar dak metaloker yintetba jagi khuret mebentetsü, lokti nung teraksa bener arutsütsü.
- * Nisung kaji süng-lung nungi tsüktetba masü, pa/la kin ka, yim, kidong, kinunger ta ali nungji nisung ka dak meshimejungi amshira nübur aser kin ka tsüngda tsükchitep, tesempatep adoktsü.
- * Kibur shirnoki kilir madak tashiyim amshia lendongi yoker, par/lar kin, yim, kidong, kinunger ajunga dangi maksü bener arutsür ta metetsüla. Tanü Aor tangari majinütsü kuli kaji kilir junga anebalu masüba ya ta metetsüla.
- * Kibong nung apuani tsüngda mangatetep aser temulung melemtep adokdaksüba jenti ajangshia arudagi. Kibong kar nungbo kilirtemi mapa ajak tempangadokerji mapa mali tajungtiba agi renemteter kazütep dang kinungbu aser kinungtsü tsüngda mangatetep aser mulung malem adokba otsü lir.

Anungji kilir ayuba nung takoksa aika lir ta angatetdi. Hau, kibong kar nung apuani anaprongla officei aoba agi tanur reprangtsü aser ki mapa inyaksütsü. Saka kodang kilir yudir, kiburtem teinyaktsü kechi, parnok koma anepalutsü, koma meima bentshitsü, kilir ka koma anitetsü tejangja angateter ayutsüla.

Kilir ayuba nungi DAYO, MTLT, Watsü Mungdang, Ao Senden, ABAM, Yimtsüng Yimden, lim arogotem teinyaktsü aika lir aser tim talenba ozüng yanglu nung ajangtsü ta jembiadoker arudagi aser aji tim. Saka ya metetdi: Lokti balalai ozüng jenti yanglutsü akok; ozüngjia tongtibang saka meima tangar chir ka asen chir ama amshitsütsü asen kibong telung nungi adoktsüla. Pa/laji asen chir den kasa ta bilema mapa agi meinyakra ozüng kisüng jagi mekümtetsü. Kilirtem jatena arogoi ministry agütsüba jagi dangbo ano mepiri. Kibur tama melenshitsüla. Asenok kilir amshiba yimya ya British colonizers yimya den kasa dang tanüa lir. Sahib aser memsahib attitude ya melenshitsüla. Iba mulungsentsü ya memelenshi tashi, tila maküm tashi Aor tsükchir dang tali züintsü. Melenshitsü mapang tongogo.

Lai Tesayuba?

Tanü kilir ayuba yimya ya modern day slavery system ta ashitsü akok. Am I a slave owner? Nai kilir dang temeim mapa inyakdar ma? ta asüngdangtsü mapang tongogo. Tsüngremi meimchir ajak Pa mesükba nung yanglu, tetezü meimchir taküm shiaji senti aser akhümtsütsü tim. Tsüngremi yangluba nisung ka alar ama rishikangshia ayutsütsü Laishiba memelar. Alar tia nung melidaksünüba agi Tsüngremi Israel nunger Ijip, Babilon, Persia lima alar talenba nungi anitet. Nisung ka sentsüh yong alar kümakasa küm tenetbuba nung aser Jubilee küm nüchi küma yoktsümela kechiaser nisung ka teti asoshi alar süa yutsütsü ozüngi memela. Laishiba alar, kilir aser aener dang koda meima bentshitsü tejangja shia angur. Tazüngkunem 24:14 nung ashir, "Nai ne linük yimitem nung alir ne adianu süshia, aener süshia, sensaker, anüngakonger aser shiba ayanger lir pa/la mekangshitsüla." Tetezü, asen tajangzük mechi tangar kilir dak züka mapa tashiyim agi inyakdaksütsü tai. Tim taah magütsü ayubaji tai. Tasen Lai nunga Kolosi 4:1 nung yamai ashir, "Kiburtem, kotak nung Kibur ka lir ta nenoki meteta kilirtem dang timi ochishia benshiang." Kilir dang ochi aser tim mapa meinyaktetra, asen tamang amajok, sayutsüngi, sarasadem amajok. Anungji kilir ka alashia, meketmesemi aser tashiyim amshia ayutsütsü temenen aser Laishibaitesayuba masü ta angatetdi.

Otem

Ao arogo küm 150 ajangba benjong amongtsü renemba mapang ka. Jubilee ta asüba temenen takokba meshiba küm aser alar nüchi küma yokba küm. Asen Aor temoatsü aginüra kilir anema tashiyim inyaka aruba mapatem atema tatok meshiba küm südaktsüdi. Taküm melenshiba, sahib-memsahib temulungsentsü, pioneer ta bilemba asüküm, mezümeküm, teyaksang melenshiba küm ka südaktsüdi. Yamaji süra Tsüngremi moatsütsü. Aener, bendanger, kilir dang ochi meinyaktetra jubileemong jenjang kecha maka akümtsü. Kilir dang ajangba mission inyakdi ta ayongzük.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



OFFICE OF THE DIMAPUR AO BAPTIST AROGO

DIMAPUR - 797112, NAGALAND

DABA OFFICE AJANGA SANGDONGER

Asen Tsüngrem taneptsür Yisu Khrista temeim salem arogopurtem ajak den lemsateper. Asenok ajaki kati ka asoshi sarasademtsüba nung metitemi alitsü ajungshir. Tanü-a arogo nungdak teinyaktsü kar yangi lemsateper.

1. Lokti tekülem magiteter asünung tershilem aser tenla agütsünertem asoshi, Deobar anepdang shia 8:00am - 9:00am tsüngda tenlaki nung oa agütsüta akok, tenzükerteri ataa alitsü. Ano tenzükerteri nem kidang agütsüta akok aser kari account nung inoktsünera teküpoklen Account details agütsür.
2. Lockdown ajanga asenok kibongtem aika timtem ajuruba ngua, asen arogoi DABA züngsem kibong nungdakertem asoshi, 15th June anepdang 7:00 am nungi jang bag kaka pei fellowship tenlaki kima agütsüner. Anungji iba teyari nungdakertemi pei fellowship Pastortem nem Phone ajanga 12th June tashi nung osang tejangja agütsüta mepishir, nungdakapurtem yariji renemja atatsü.
3. 13th June 2021 ya asen DABA Thanksgiving anogo lir. Asenok lokti sentep magiteter asünung yaküm ama online ajanga dang iba sentong agütsü. Taoba mapang ama tenla asoshi envelops lemja maruteter, anungji nenoki anepalua DABA Thanksgiving tenla ta zülur agütsüta mepishir. Kari online ajanga agütsünera teküpoklen Account details agütsür aser iba tenla küm piyong mashie mapang nung agütsüta lapoka yutsür.
Dimapur Ao Baptist Church:
Account No. : 0160104000100830
IFCS Code : IBKL0000160
IDBI Bank Ltd, Dimapur Branch.
Account nung inoktsür iba contact no. 09436003057 nung ne details agütsüta mepishir.
4. Asenok ajaki kanga sarasadema arudagi ano 12th June 2021 honibar anepdang, arogopur ajaki pei kidang ghonta ka 5:00 am - 6:00 am sarasademtsü ayungzüker. Sarasadem asoshi onük kar agütsür.

SARASADEM ONÜK

"Kibubai ashir, tang danga nenok temulung ajak agi nenoki lumitsüsa, aser jeba, aser mang yima, aser kü dangi meyipang. Aser nenok süoshi masü, nenok mulungjang shisa-ang, aser Kibuba nenok Tsüngrem dangi meyipang; Kechiyong Pa taochi aser aria bilemba agi sünga lir,..." (Yoel 2: 12-13).

1. TENÜNGSANG AGÜTSÜBA.

- 1) Tsüngrem taochi agi asenok mesamai tanü tashi arishi agüja, iba sarasadem nung tentetsüsa mapang tajung moatsüba asoshi Tsüngrem nem tenüngsang agütsüdi.
 - 2) Taküm küm tenzüker tanü tashi, Tsüngremi ne Taküm lentong timtem, aser tashidak balala nungi kümzüka yutsüba asoshi tenüngsang agütsüdi.
 - 3) Iba covid 19 wara ajanga asenok akitang dang nungi tali sarasademtsü, Tsüngrem O azüngtsü, kibong tekülem agütsü, achi ajem yimya azüoka melenshütsü aser pei taküm tanela yanglushütsü maongka ka bener arutsüba asoshi Tsüngrem nem tenüngsang agütsüdi.
 - 4) Alima wara tulu liaka asenokbo Tsüngremi chiyongtsü, talidak ki tajung, aser asen nungdakba ajak moatsüba asoshi tenüngsang agütsüdi.
- #### 2. TATOK MESHIBA.
1. Asen Otsüla aser obola nung mapang aibelenba temenen kar ajanga, asen kin dang Tsüngrem mepelai asenoki Pa temoatsü magiteteri lira, aser Tsüngrem terasaba atakatem agi meneptsüsa lira, iba asoshi tatok meshidi.
 2. Tanü asen Aeri Tsüngrem mepeladaktüba kechi nungsa lir tatok agüjang ta sarasademdi.
 3. Asen Aeri tanga kintem dang tatishütsü tajung mesayutetba aser mepeladaktübatem kar lira iba asoshi tatok meshidi.
 4. Tanü aser Aoertem Tsüngremi Pa temoatsü nung kümzüka anir aruaka, aiben asenoki Tsüngrem nem tenüngsang agütsüdi, aser Tsüngrem temeim mezüngshiba asoshi tatok meshidi.
 5. Naga kin rangben asoshi lensanir asütsü Tsüngremi asen Aeri shimetet sür nung, yamaji melitetba aser tatishütsü tamajung tang sayutetba asoshi tatok meshidi.
 6. Yimsürtem aser Government nung lenirtem aser tenzükerteri shitak metenzükterba aser ketang mesütetba temenen nangzüki.
 7. Tamangertem mungdang, arogo aser lokti balala nung Tsüngrem tenzükerteri Tsüngrem sentong angateta metenzükterba asoshi temenen nangzüki.
 8. Tanü tamangertem pei tepok ayim dang aser pei wadang inyak dang, sentepi aotsü, kibong tekülem agütsü, Tsüngrem o azüngtsü aser sarasademtsü ama toka lira, iba asoshi tatok meshidi.
 9. Tanü asen yimten, lokti aser arogo nung nüburtem rongnung Tsüngrem mepelaba inyakyim kechisa lir iba asoshi tatok meshidi.
 10. Naga kintem rongnung telemsatep, tenükmeremtepba, arishitepba aser kati ka memeimtetba asoshi tatok nangzüki.
 11. Tsüngrem lima nung alidang, tanü alima tejakleni aoba aser meimchiri tasen teyanglutetbatem dak temulung lemer, ozü lima ta mezüküm o jembia ulua bilemba, pei inyaknuba inyaka Tsüngrem teyangluba lima raksatsüba aser Tsüngrem amaadokba asoshi tatok meshidi.
 12. Pei kibong temenen bushia sarasademdi. Kibong nung züngsem ajaki asen dang ajung asa-a inyak dang, meteta aser memeteti aibelenba temenentem kar lira item temenentem nangzüki.

3. MEPISHIBA

1. Covid 19 tashidak agi kibongtem aika nung senti taküm jenti samaogo, ano kar kibong nungbo kirep asüba aser tsürabur anapronglai toktsür or tanurtem lajar kuma lir. Item nüksü yima temulung raksa-a aliba kinüngertem ajak nem, Kibuba nungi tesüneptsüba, Teyimla aser Teyari agüjang ta sarasademtsüdi
2. Covid 19 agi shirangertem asoshi tetsüba masü saka teyimla aser taneptsü agüjang ta sarasademdi.
3. Tanü tensa wara tulu mazuoktetki aoba mapang ka nung mozü shiteter, medical scientist, doctors, nurses aser mozü kidang inyakerkem ajak nem Tsüngrem tekümzüka aser shisatsü agüja nüburtem asoshi inyaktetsü tashi agüjang ta sarasademdi.
4. Tang tensa nung Front Line workertem shirnoksa kanga anibelega inyakdagi parnok ajak tashitak wara nungi kümzüka yujang aser nüburtem asoshi inyaktetsü tashi aser shisatsü agüja ajungketa amshiang ta sarasademdi.
5. Iba wara koktettsü asoshi alima lenirtem nem alima aser nüburtem dang meima inyaksü Tsüngremi tangatetba shisatsü tajung agüjang ta sarasademdi.
6. Shiranger aser tasürtem asoshi Sannükertem kanga mazüngi wadang balala nung jajadagi Tsüngremi Pa kilirtem kümzüka yujang ta sarasademdi.
7. Covid-19 tashitak prokshia aoba ya Tsüngrem tashi tulu agi nokdangang aser alima nungi meshimeshia samajang ta sarasademdi.
8. Covid 19 tashitak ya ajanga amangbapurttem kija aser kibongtem ajak asoshi, Tsüngrem tajaba ola angashia, Khrista den tamang tesendaktep yanglushiba mapang tajung ka sudakjang ta sarasademdi.
9. Tanü arogotem nung Yerimia Ainkar ama alima aser nüburtem temenen asoshi khuret bona, nüktzü ayimba amangbapurttem adokdakang ta sarasademdi.
10. Nüburtem covid 19 tashitak tsüba masü, Tsüngrem tsüba nung dang taneptsü lir ta agateta, alima tashi dak masü saka Tsüngrem dak jenoktsü tashi agüjang ta sarasademdi.
11. Iba Covid 19 wara ajanga Naga nung ajungai sodaka aliba temenen toktsür, tanela jenjang shitak bushitetba asentenshi mapang ka sudakjang ta sarasademdi.
12. Aki ama asen Ao kin ya, Naga kintem ajak asoshi tayarir tajungtiba süa, tejakleni anir aoba kin ka kümdakjang ta sarasademdi.
13. DABA ya amangbapurttem ajak asoshi tanela aser shi taküm anaprongla nung taneptsü angudak aser tejenokdak arogo ka sudakjang ta sarasademdi.
14. Asenok kibongtem ajak iba wara nungi kümzüka, shinga kibong nunga tasüba tatalokdaktü, ta sarasademdi.
15. Tsüngremi iba sarasadem mapang tepiyung ania moaja asen sarasadem langzüba asoshi Tenüngsang agütsüdi.
Lokti tekülem magitetba ya, kibongtem ajak nung tekülem asentenshiba mapang ka sudakjang ta sarasademtsür.
Asenoki kümdanga aliba den ano sarasadem nung kanga akanga alitsü merengdi, kechiaser Sarasadem dak asenok kümzüksü tashi tulu lir.

Tsüngremi moajang.

Rev. I. Wati, Pastor
Dimapur Ao Baptist Arogo

ANO GO ABEN TSÜNGREM DEN

LENISÜBA TANELA

"Ochi Tanelai nenok ajak ochiba dangi anitsü."

Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaktü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaktü. Kodang tesayuba Tsüngrem nungi mesülir idakji jangratem aser tipdem ka malitsü. Iba indang tenyar Yohani tejangja ashi. "Shirnoki nenok mashileni anisar, parnok indang ni item o nenok dangi zülüogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüngdaktü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioktütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaktü! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaktütsü makok.

Pauli 1 Tesalonikia 5:19-22 nung Tanela remsepdaktüba mapa asem sayur.

- 1) Sayutsüngiba mezüngmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang. Tesalonika arogo nung Grik nung süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentenshi sayutsüngidang sayutsüngiri mezüngbuba onük nungji aibelener. Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaktü, aser asenok dak aliba Tanelaji remsemdaktü, tangar tanelatem ajak sakdaktü. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!
Tanela Temeshi arung, kechiaser Na ajanga ainkartemi zülü aser jembi, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

Nüngtugu sayutsüngir, T Balogun Joshua alima nungi pilaogo



Temitope Balogun Joshua

June 07, 2021: Nigeria nung nungtugu sayutsüngir aser pastor, Temitope Balogun Joshua mejangjaba tashidak kati Honibarnü (June 5) süogo; pa arrshi küm 57 liasü, ta par Arogoi Facebook post ka ajanga metetdaktü.

TB Joshua-i Lagos nung Synagogue Church of All Nations Arogo tenzüka liasü, iba dak alia pai television ajanga sayutsüngiba agi nisung million aikati Khrista agizükogo.

Amongnü tekülem sentong shia nung par Arogo nung nisung 15,000 dak tema adenshir.

Arogoi Facebook post ka ajanga, "Tsüngremi Pa tenzüker TB Joshua kidangi jaogo. Pa akümüli tembangtsü mapang tashi pai Tsüngrem tenzüker," ta metetdaktü.

Pastor indang lawyer, Olalekan Ojo-ia, "Tsüngrem

nisung, pastor TB Joshua Honibar (June 5) nikongdang sentong tagidak mapang nung alima nungi pila," ta metetdaktü.

Nigeria yimtiba, Abuja nung osangbener Ahmed Idris-i, Africa nung nütsüng timba aliba linük (Nigeria) nung kanga akhümsüba pastor tem rongnung pa ka liasü, ta ashi.

"1990s mapang Nigeria nung television ajanga sayutsüngiba mapang nung pa kanga nungtugu aküm. Nigeria aser Africa tesem ajaklen social media nung followers timba alirtem rongnung ka densema lir," ta Idris-isa metetdaktü.

Par Arogo nung züngsemtem rongnung Africa nung Tir inyakerkem, sorkar tongti ketdangertem, football asayar aser nungtugu kentenerkem aika lir.

2014 küm September ita nung par Arogo indang guest house chirepba lendong nung nisung 100 dak tema asü aser asürtem rongnung bendangertem-a aika liasü.

Taküm April ita tashi nung pastor Joshua indang YouTube channel subscribers million 1.8 aser views million 600 dak tema liasü.

OLONG PAITEP # 5837

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPIEN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 5836 TELANGZÜBA

TIPIEN :	LANGTSÜNGLEN :
1. Aben, 4. Artsü, 7. Lisem, 8. Liwa,	1. Aruli, 3. Balala, 5.Suwar, 6. Belem,
9. Sarasadem, 12. Aket, 14. Mangu,	9. Sүjak, 10.Aonung, 11. Dokan,
15. Anünü, 16. Ango.	13. Tinu.



ALOKBA O SOBANGBA NA ACCIDENT AJURUR :

Alokba o Sobangba na künü anogo pei pei gari bener lenkho ka nung speed mesottet accident ajurur tenaprongla garijibo anuka ajasa saka tenabo kacha meyiru nung süngmangseta jembir.

- Alokba** : Temba oda aseni sarasademer ayazükba agia, caribo yamai ajasayonga anabo temezünglaka meyiru, ya kechi sayatenya?
- Sobangba** : Atangjia temba, Tsüngrem tenüng sangdima, ataangjo, ai ni nüngdak nung amshitsü Whiskey pongdang ka inoka abenba kanga junga lir ya koda! Anabo anaprong kümzükba tanüng nung fifty fifty jemdi ang na tama agiang.(Alokba bottle half ka jemer tetemba nem agütsür)
- Alokba** : Temba ang, ni half ka jemogo tanüngbaji na asüokang.
- Sobangba** : Ni tangbo magitsüar.
- Alokba** : Wa, koda asü?
- Sobangba** : Tang police arua anaprongla dang asüngdangyatsüji Iba sülenang agijaar.
- Alokba** : Saalaa!!

Lilir : WhatsApp

TANÜBO NAI LANGZÜANG

Q. Koba state sorkar ajanga Ankur Scheme tenzüksü?
 A.Madhya Pradesh B.Maharashtra C.Odisha D.Karnataka

_____ (Taruba adok nung onoki langzüksü)
YASHI ADOK TELANGZÜBA : Temperature logger

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Jilok

(v) ajungbena tenji, aoksaajurutep (sudden encounter)

* Parnok chiyonga alidak ni oa **jilok**.

Joklok

(v) ponglokba (jump over)

* Gari ooya alidang onoki tesülen **joklok**.

NAI-A YA METETTER MA?

ASETKONG (ISLAND) TIMTIBA ALIBA LINÜKTEM:

LINÜK	ASETKONG
33 Bahamas	700
34 Micronesia	607
35 New Zealand	600
36 Turkey	500
37 Belize	450
38 Venezuela	418
39 Svalbard	400
40 Eritrea	354
41 Palau	340
42 Fiji	330
43 Turks and Caicos Islands	307
44 Ireland	270
45 Colombia	270
46 Hong Kong	263
47 Yemen	220
48 Italy	210
49 Bermuda	181
50 Tonga	169



SUDOKU # 5879

TELANGZUBA # 5878

2		9		8				1	7	2	3	6	5	4	1	8	9	
1		8		5	7	3			4	6	1	2	9	8	3	5	7	
							5	4		8	5	9	3	7	1	4	6	2
		9	7	5		8		3	6	1	9	5	4	8	2	7	3	6
5	2	1	3		6	8				6	7	2	1	3	5	8	9	4
8	6				9			2		3	4	8	7	6	9	5	2	1
				7	1					9	3	4	5	1	6	2	7	8
7	3	4	8			9				5	1	6	8	2	7	9	4	3
	1	5		3		2	8	7		2	8	7	9	4	3	6	1	5

OJANG LUTEP # 5423

- MTYII :
- SBAÜIJI :
- TBUAMR :
- SÜMA :
- ABLIJA :
- AT :
- JAAKI :
- TETMEER :
- ENBKÜLO :
- ATESASP :

OJANG LUTEP TELANGZÜBA # 5422

PEI DANG AJANGZÜKTSÜ BUSHITEPDANG KHEN KHENBO
 MEMETETI AJAK LONGJEMTSÜSA AKÜMER

TAN HOPTA ATEMA - KOMA SÜLA ?

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulurtemi chia-adok nunga koma süla ?



New Delhi, June 07, 2021: Hombarnü New Delhi nung Delhi Metro Service tenzükba sülen Lakshmi Nagar Metro Station nung nisungtem train-i ayaketa atutsü ataba noksa nung angur. Hombar nungi tenzükba Delhi sorkari dokan aser shopping malls anogo tentema lapoktsü melaba den nija office tem nung inyaker shilem 50 mapai aotsü melaogo.

Centre sorkari Covid-19 data mimshir: Priyanka Gandhi Vadra

New Delhi, June 07 (Agencies): Hombarnü Congress lenir, Priyanka Gandhi Vadra-i, Centre sorkari coronavirus dak sendakba data mimshir, ta aitsü.

"Zimmedaar Kaun (ya shiba khuret)" campaign kübok lai wara dak sendakba nung sorkar inyakyim ashishia tasüngdangba balala asüngdanga arudar.

Congress general secretary, Priyanka Gandhi-i Facebook, Twitter aser Instagram ajanga, "India nunger taküm kümzüksü dang nungibo Ato kilonser tenüng-menük kümzükba ayutsüji tongtibangba asü?" ta asüngdang.

"Iba wara tenzükba mapang nungi Modi sorkari (coronavirus) data ya coronavirus anema raratsü atema hadir ka ama masü saka yimtenren hadir ka ama amshir," ta Priyanka Gandhi-i sangdong

ka ajanga metetdaksü. Laisa, "Tan Aso nung timtem tulutiba ajanga nisung jenti samaba mapang nung sorkari parnok yimtenren nükjidong ataloktsü atema (coronavirus) data mimshir," ta aitsü.

"Modi sorkari taküm kümzüksü atema masü saka yimtenren kümzüksü atema inyakba ajanga takoksa tulu nguogo. Parnoki India nürburtem nem telangzüba agütsüsüla," ta lai ashi.

Uttar Pradesh state atishia lai, "State sorkari ochi mimshitsü atema TT-PCR aser antigen test data na külemi sayur. Medemdangra antigen tests nung kanga imlatsü mali. Tanga Uttar Pradesh nung RT-PCR tests aser antigen tests ratio ji 65:35 lir," ta lai ashi.

Tenüng menük kümzüksü nükjidong nung sorkari tashidak putetba aser nisung asüba osang

tejangja mimshir, ta lai ashi. Ganga ayongküm nung tasü mang 2,000 dak tema anguba osang dak sendakba nung Priyanka Gandhi-i, UP nung Ganga ayong yagi district 27 ayimjemer, aser asürtemji ka danga sorkar indang records nung züngshia mali, ta ashi.

Laisa, official süa nisung asüba records aser Varanasi, Gorakhpur, Lucknow, Kanpur, Jhansi, Meerut yimitem nung nisung rongdokba tesemtem aser leper nung tasü mang aremba naji meputeper; sorkar record dang nungibo leper nung tasü mang alibaji kanga agia timba, ta metetdaksü.

"Coronavirus anema inyakba dang nungi Modi sorkar tenüngji tongtibangba asü? India nunger kümzüksü dang nungi Ato kilonser tenüng-menük kümzüksüji tongtibangba asü?" ta lai ashi.

PMGKAY scheme kübok November tashi jang angati agütsüsü

New Delhi, June 07 (Agencies): Hombarnü Ato kilonser, Narendra Modi-i, nungdabapurtem nem angati ration agütsüsü atema taküm Diwali benjung tashi Pradhan Mantri Garib Kalyan Anna Yojana (PMGKAY) scheme atsülanger, ta metetdaksü.

Central scheme kübok India nunger crore 80-i taküm November ita tashi jang angati angutsü, ta paisa metetdaksü.

Hombar nikongdang 5:00 ako nungi linük nürburtem den

jembidang Modi-i, "Tang iba wara mapang nung sorkari sensakertem nungdak peritsüsü atema inyaker," ta metetdaksü.

Coronavirus wara mapang nung timtemertem khuret pungbatsüsü nükjidong nung yaküm March ita nung Centre sorkari food security welfare scheme (PMGKAY) ya tenzükba liasü.

Iba scheme kübok Public Distribution System ajanga ration card holders aser Antyodaya Anna Yojana

scheme kübok tenüng alirtem nem angati jang agütsür.

May ita nunga PMGAY scheme kübok India nunger crore 55 nem jang angati agütsüogo aser June ita nunga crore 2.6 nem agütsü.

Taküm May ita atema states aser UTs 34 nem jang Metric Ton lakh 28 agütsü aser June ita nung Metric Ton lakh 1.3 agütsüogo, ta Department of Food & Public Distribution Secretary, Sudhanshu Pandey-i metetdaksü.

India nung Covid case lakh 1.03 putet aser nisung 2,427 asü

New Delhi, June 07 (Agencies): India linük tesem aika nung coronavirus wara süngjemba mapang tesüiba ghonda 24 nung nisung lakh 1.06 dak dang coronavirus tashidak putet, aser ibaji tesüiba ita ana tsüingda anogo ka kija nung ishitiba putetba lir.

Tesüiba ghonda 24 tsüingda coronavirus tashidak agi nisung 2,427 asü aser ibaji densemabo tang tashi nung linük nung iba tashidak agi nisung 3,49,186 süigo, ta Hombar nep 8:00 ako nung Union Health Ministry-i metetdaksü.

Amongnü samples 15,87,589 tendang aser tang tashi nung samples ajak agi 36,63,34,111 tendangogo aser tang anogo shia positive putetba shilem 6.34 lir.

Tang linük nung coronavirus agi teshirangdakpur 14,01,609 dang kümogo aser ibaji coronavirus caseload nungi shilem 4.85 dang lir.

Linük nung coronavirus agi shiranger shilem 93.94 (nisung 2,71,59,180) anepogo aser iba

tashidak agi shiranger asüba shilem timba küma 1.21 jungogo. Tesüiba ghonda 24 tsüingda coronavirus agi asür 2,427 nungji Maharashtra nung nisung 618, Tamil Nadu nung 434, Karnataka nung 320, Kerala nung 227 aser West Bengal nung nisung 107 asüba densemabo lir.

Tang tashi nung linük nung iba tashidak agi nisung 3,49,186 asüba state temji Maharashtra (1,00,130), Karnataka (31,580), Tamil Nadu (27,005), Delhi (24,591), Uttar Pradesh (21,236), West Bengal (16,259), Punjab (15,076) aser Chhattisgarh (13,217) state tem lir.

Maharashtra nung coronavirus tensa tajungba akümba sülen Hombar nungi wara anema tenokdangbatem agien tenzükogo. State nung shilem pongu lemsar tenokdangbatem tanem-tanemi agientsü sorkari lemtet.

Wara süngjemba nung ajemdaker Delhi nunga Hombar nungi tenokdangbatem agiendar.



Mumbai, June 07, 2021: Maharashtra nung coronavirus wara süngjemba agi shilem pongu lemsar tenokdangba balala agientsü. Hombar nungi Mumbai nung bus senzüsü melaba sülen nisungtem bus-i ayaketa atutsü atema tarensena nokdaka aliba noksa nung angur.

Tikait-i Mamata ajurua aluyimertem tebilemetsü onük lemsateptsü

Fatehabad (Haryana), June 07 (Agencies): Bharatiya Kisan Union (BKU) lenir, Rakesh Tikait-i June 9 nü Kolkata nung West Bengal Chief Minister, Mamata Banerjee ajurua senden amentsü, ta osang ka ajanga metetdaksü.

Iba senden nungji Tikait-i Mamata den Centre sorkari benokba aluyimba ozüing tasen anema aluyimertemi maneni longkak tesashiba aitsü atema jembitsü.

"June 9 nü Rakesh Tikait-i chief minister Mamata Banerjee ajurutsü. Election nung takok anguba atema pai la nem tenüngsang agütsüsü. Tenati aluyimertemi longkak aitba indang jembitsü," ta osang ka ajanga metetdaksü.

West Bengal assembly election atongtsü anasa Tikait-i West Bengal semdanga Trinamool Congress (TMC) party atema nübo yimja liasü.

West Bengal chief minister Mamata-ia Centre sorkari benokba aluyimba ozüing tasen anema ola aiben adokogo aser lai aluyimertemi longkak aitba pusemer.

TMC MP tema aikati Delhi arrtsülen aluyimertemi longkak aitba tesem semdanga liasü.

Tang linük nung coronavirus wara kanga süngjemdar, ibayongji aluyimertemi asentenshir longkak tesashiba aitsü sentong yanglur.

Ano tanga osang ka nung, Honibar aonung nungi tenzükba Haryana kübok Fatehabad district nung police station kima aluyimer lenirtem- Rakesh Tikait, Gurnam Singh Chaduni aser United Kisan Morcha lenir, Yogendra nunger leniba nung aluyimertem aika adenshia pua aliba aluyimertem chiokang, ta takhangba agüja longkak aitar.



Annur (Tamil Nadu), June 07, 2021: Hombarnü Elayavoor anasa Mundayad nung ambulance ka tsükoka aliba noksa nung angur. Coronavirus tashidak agi shiranger ka Payyavoor nung aliba nija hospital ka nungi Kannur nung aliba hospital kati anir aoba mapang nung ambulance anisangi gari mazüokteti süngdong ka nung tsükoktsüba lendong nung nisung asem asü.

Nepal House shibangba ken o jembitsü atema bench ka tentetogo

Kathmandu, Aami/June 07 (Agencies): Nepal nung yimtenren tsütsü mangatetep adoka aliba ken o tongtipang jembitsü atema nübu shimba nung obendangertem obang mapuba sülen Tiri May 22 nü House of Representatives anentsüba anema ken o kar benoka aliba jembitsü asoshi Nepal Supreme Court ajanga Constitutional Bench tasen ka Deobarnü tentetogo.

Supreme Court Justices nung seniority aser expertise nung ajemdaker iba bench ya Nepal indang Chief Justice Cholendra Shamsher Rana-i tenteta liasü.

House anentsüba dak sendakba ken o tem angatsü aser jembitsü atema Constitutional Bench ka June 6 nü tentetsü, ta Chief Justice ajanga shia liasü. Iba Constitutional Bench tasenba nungya justices Dipak Kumar Karki, Anand Mohan Bhattarai, Mira Dhungana, Ishwar Prasad Khatiwada aser pa dena lir, ta court ktdangsürtemi ashir.

Lokti tajembai tenteta aliba sorkar nungi Ato Kilonser K P Sharma Oli-i ashiba ama züngsem 275 aliba House of Representative ya May 22 nü Nepal Tir Bidya Devi Bhandari-i anentsü aser November 12 aser November 19 nung election agitsü sangdonga liasü, koba ita pongu tsüngta tanaben shibangtsür alitsü. Justice Bishwambhar Prasad Shrestha shirangba ajanga pa melen justices Bhattarai aser Khatiwada na Constitutional Bench nung shimok.

Constitutional Bench tentetba tsütsü mangatetep aliba ajanga ken o jembiba nunga kongshia liasü. Constitution nung mela maliba yimya nung House anentsüba anema petition 30 shi zülüoka aliba jembitsü atema Chief Justice Rana-i Dipak Kumar Karki, Aanand Mohan Bhattarai, Tej Bahadur KC aser Bam Kumar Shrestha nungertem shimteta liasü, ta court osang ka ajanga ashir.

Nepali Congress tir Sher Bahadur Beuba, shibai Arrla 76 (5) kübok sorkar tasen ka tentetsü sangdonga liasü, pa densema shibangja aliba House nungi züngsem 146-i House tanaben lapoktsütsü atema Supreme Court dangi petition zülüa liasü. Ato Kilonser Oli aser Opposition telok temi sorkar tentetsü osang balala sangdongba ya tabensa masü, ta shia Tir Bhandari-i magizük.

Communist Party of Nepal telungjem aser registration ken o asadanga mapang Constitutional Bench indang züngsem ama shimteta obendanger anati taoba mapang obendang agütsüba nung Deuba indang okatsür kati ashishitepba sülen mangatetep ya adoka liasü. Iba dak sendakba ken o nung metdong, justice Tej Bahadur KC aser Bam Kumar Shrestha nati bench meyutsütsü lemtetba sülen Constitutional Bench atema shimba justice anati iba bench nung amentsü memolung.

Iba yongji Parliament shibangba anema ken o benoka aliba jembitsü atema Chief Justice Rana-i bench tanaben shimshitsüsa akum. Iba ken o jembitsü atema Chief Justice Rana ajanga Constitutional Bench tanaben shimshiba atema Ato Kilonser Oli indang okatsürtemi mepelaba olen kar Deobarnü shia liasü.

Iba ken o jembitsü atema tang roster nung aliba obendanger 13 nungi 11 temsüa mali, ta advocates Rajaram Ghimire, Deepak Mishra, Krishna Prasad Bhandari aser Yagya Mani Neupane nungertem ashir.

Parliamentary hearing committee nungya ken o benokera dena lir asünung, ken o jembitsü metemsü, ta Oli indang advocate temi ashir.

Item kasa advocate tem yagi House tanaben lapoka Oli tanaben shimshitsü atema tezüluba nung ken o benoka liasü. Iba onük nung telangzüba agütsüba mapang Chief Justice

Rana-i advocate tem dang parnoki benoka aliba ken o magienra parnoki court mezüngmeshi, ta ken o benoktsü metetdaksü. Saka Oli'er advocate temi tekong meranga nokdaka lir.

Kasa mapang Attorney General Ramesh Badal-ia iba bench tanaben shimshiba anema nokdak aser iba ken o atema mezüng shimba bench ajanga dang kasa ken o ya jembitsüla, ta ashir.

House of Representatives anentsüba dak sendakba ken o jembitsü asoshi tensa tamajungba kuma ken o jembitsü atema Constitutional Bench shimba nung mangatetep adok. Züngsem ishiba aliba Oli sorkari Cabinet melenshiba aija Nepal nung Opposition telok temi Honibarnü sangdong ka agüja liasü.

Oli-i Hokulbarnü Cabinet melenshia liasü. Cabinet tasenba nung Deputy Prime Minister asem, cabinet minister 12 aser state minister ana lir. Oli-i House anentsü atema inyakba ken o Supreme Court nung benoka aliba mapang Cabinet melenshiba ajanga pai Constitutional aser democratic yimya mezüngmeshir, ta Opposition alliance ajanga sangdong ka nung ashir.

Nepal nung sorkar tenteta aliba Nepal Communist Party (NCP) telungzük nung tashi agi raktepba mapang Ato Kilonser Oli-i ashiba nung ajemdaker taoba küm December 20 nü Tir Bhandari-i House shibangtsüba sülen Nepal nung yimtenren tsütsü teraksa adok. Oli-i House shibangtsü mera agiba ajanga pa den tokteper Pushpa Kamal Dahal 'Prachanda' lenisüba kübok NCP nung telok tulukati longkak aita liasü.

Ajisüaka ita ana lir Chief Justice Rana-i aniba Constitutional Bench ajanga February 23 nü iba telemtetba agienja House of Representatives ya tanaben anioka liasü.

Pakistan nung train ana tsüktep; nisung 50 asü



Ghotki, Pakistan nung tran ana tsüktepba sülen tangokba noksa ka yangi angur. Southern Pakistan nung express train ana tsüktepa nisung jenti asü aser ano aika yirua liasü, kong ketdangsür aser yimdaklir temi train teraksa nungi yirur aliba aser tasü mang atsütetba mapang lir.

Karachi, Aami/June 7 (Agencies): Pakistan kübok southern Sindh Province nung Hombar anepdang train ana tsüktep aser iba lendong nung nisung 50 asüba den nisung 70 shi yiruogo, ta Pakistan Railways otongdar kati ashir.

Karachi nungi Sargodha-i oya aliba Millat Express train lenmang nungi senchia aoba sülen tanga lenmang ka nung Rawalpindi nungi Karachi-i oya aliba Sir Syed Express den tsüktepba liasü. Train tsüktepba sülen tekümzükba maparen inyaktsü asoshi tamakoktsü akümba ajanga ktdangsürtemi Army aser paramilitary forces anisema liasü.

Train tsükteper aliba nung ano nisung kwi sabanga lir mejangja, ta osang agütsüba mapang tashi nung ktdangsürtemi metetdaksür liasü. Iba lendong ya northern Sindh province kübok Daharki tesem anasa atalok aser tekümzükba maparen inyaktsü atema specialist equipment bener arutsü metetdaksüogo, ta otongdarisa ashir.

"Train tsüktepba tesem ya kinük nung aliba tesem ka lir,

anungji tekümzükba maparen inyaktsü asoshi tetsükdaksü adoker," ta pai ashiba den iba lendong nung wagon trok raksaogo.

Otongdari ashiba agi, Karachi nungi Sargodha-i oya aliba train ya anepdang züngia lenmang nungi senchia ao aser tanga lenmang ka nung Rawalpindi nungi aruya aliba Sir Syed Express den tsüktep.

Nisung 22 süogo aser nisung 50 shi yiruogo, ta otongdari ashir. Kasa mapang nung Daharki nung police ktdangsür Umar Tufail-i, train ana tsüktepba sülen nisung 30 süogo, ta ashir.

Iba osang angazüka Ato Kilonser Imran Khan-i pa kanga aoksaba lemsatepogo aser ken o bushitsüngdangtsü nangzükogo.

Pakistan nung Rail accidents ya kanga bulua ataloker, kong train lenmang kilometer meyirejang aika lir.

Ajisüaka ochimashi inyakyim, senotsü peria mintokba aser junga achayang masüba ajanga lendong aika ataloker.

Television nung sayuba mobile phone footage ajanga train tsükteper aliba sayuogo.

Suu Kyi anema benokba aliba ken o tem taruba hopta nungi angadangtsü

Yangon, Aami/June 7 (Agencies): Myanmar nung military-i atsüngtoker aliba lenir Aung San Suu Kyi anema benoka aliba ken o tem taruba hopta nungi angadang tenzüktsü, ta la okatsüri Hombarnü AFP dang ashir.

February 1 nü Suu Kyi-i aniba sorkar atsüngtokba sülen Myanmar nung mepetmesü tulu adoker lir, aser anogoshia amai longka aitertemi military anema longka aita arudar aser tang tashi nung nisung 850 shi süogo.

Taoba küm election atema nüboyimba mapang coronavirus dak sendakba nung tenokdangba agütsür aliba anema inyakba aser license makaba walkie-talkies yua aliba densema ken o aika nung Suu Kyi aija lir.

"Ken o angadanga mapang kuli agütsürtem aikati kuli agütsüba angutsü," ta obendanger Min Min Soe-i Hombarnü Suu Kyi den linük yimtiba Naypyidaw nung

ajurutepba sülen ashir. Suu Kyi anema benoka aliba ken o ya June 14 nü nungi angadang tenzüktsü.

"Lai nüburtem ajak anema alitsü imlaja ataba lemsatepogo," ta Min Min Soe-isa ashir.

Junta-i Suu Kyi lar kidang sota ayuba sülen Min Min-i la den anaben dang ajurutepa lir. La anema benoka aliba ken o tem angadangtsü atema atsülangyonga aoer aser la okatsür den ajuruteptsü temelaba mongui arudar.

Myanmar junta-isa, lai aniba political party, National League for Democracy loksatsütsü amokmerena arudar. Lar party-i 2020 küm election okshia akok saka military-i election inyakyim nung ochimashi inyakyim lir ta ashir.

AFP otongdar kati ashiba agi, okadak anasa Naypyidaw council compound nung police tem aika yoka lir aser iba tesemi aoba lenmangtem ajak mokdanga lir.



Peru Tir atema tokteper Keiko Fujimori-i Lima, Peru nung la indang vote agütsüba sülen la busemer dak teka ayuploktsüba mapang tangokba noksa ka yangi angur. Tepuokdak yua alisang taoba tir Alberto Fujimori'er jala Fujimori aser yimtenren nung nübu tasen, Pedro Castillo tir menden asoshi toktepba election nung Peru nüburtemi vote agütsür.

MULUNGNEN O



Aso:
10.03.1950

Aso:
20.06.1953

Asü: 1st June 2021

Ozü-i teti meima aliba tsürabur Asür.Mr.**A.Chuba Walling** aser Asür.Mrs **M.Nungsangla Imchen**, tena ajungbena 1st June 2021 anogo pila-a aoba mapang,ozü asükhu mapang temeimer shironkisa tamang sarasadem, nubo, shisatsü aser rongsen agi yariogo nenok ajak dangi tsüngdong arua ozü pelaba meshitet nung iba osang ajanga nenok ajak dang ozü kinunugertemi kanga pelaba lemsateper.Tulusang Tsüngremi nenok taküm kibongtem talubosa moajangma ta ozü sarasadem.

~ Temeim Chirnur, Semchir Kinunger aser adianutem.

MULUNGNEN O



LATE M. LONGRI LONGKUMER (WAROMUNG)
26-06-1937 to 04-06-2021

Ozü temeim kinungbo aser tsürabur **Wb.M.Longri Longkumer** mapang tatsüka shiranga alidang aser pa iba lima nungi 04th June 2021 anogo nung pilar, onok mangyim jashi nung alidang onok dang meima sarasadem, nübo aser rongsen agi yariteper kija – kibong, arogotem, yimtsür - yimer, kidang-kiyonger, adianu - kinungertem aser temeimertem ajak dang onoki kanga pelaba mulungnen o ka yangi lemsateper.

Onoki nenok nisung shia tsüngdong arua pelaba meshitetba atema kanga sasar, ajisüaka Tulusang Tsüngremi nenok ajak talubosa moajangma ta onoki sarasademtsür.

- Temeim kinungtsü, chirnur, anük-apang aser kinungertem.

Mohit Raina-i nisung pezü anema ken o benok

New Delhi, Aami/June 07, 2021 (Agencies): Devon Ke Dev- Mahadev' nung tongti actor Mohit Raina-i nisung pezü anema ken o ka benokogo. Par pezü yagi social media sabang nung 'Mohit Bachao (Save Mohit)' campaign tenzük ama temulung melemi bilemer.

Mohit dang nungi tashiyim agi sen meshia agiba atema Sara Sharma densema nisung pezü anema police-i ken o ka benok.

Court ajanga iba ken o benoktsü asoshi police dang teyuba sülen, iba ken o benoka liasü. Borivali Court tetuyuba nung, Sara aser lar medemer Parveen Sharma, Aashiv Sharma aser Mithilesh Tiwari nung anema June 06, 2021 nü



Mohit Raina (File photo)

sections 384 IPC kübok Goregaon Police Station, Mumbai nung ken o benokogo. Police sangdong ajanga

angazükba agi, asür Sushant Singh Rajput ama Mohit taküm lendong nung lir ta par pezü yagi olulu osangtem prokshi. Ashikülak maparen inyaktüsü asalentong yangluba, police dang tiyazü osang agütsüba, amokmerena aser tashiyim amshia sen akhangba dak sendakba nung ajemdaker par pezü anema ken o benoker alitsü.

Taküm April ita, Mohit dak novel coronavirus positive puteta liasü.

'Devon Ke Dev - Mahadev' dak alaka, Mohit-i nungtugu film 'Uri: The Surgical Strike' nung shilem agiba nguogo. Web show - 'Kaafir' nunga pai shilem tajung agiba atema terepranger aikati telangzüba tajung agütsü.



OFFICE OF THE
LONGJANG SENSO MUNGDANG
P.O.: Impur, BPO : Longjang, Mokokchung : Nagaland

TENÜNGSANG AGÜTSÜR

Mr. & Mrs. Bendang T. Jamir jala, Miss. **Tsükjemchila Jamir-i** State Bank of India Mokokchung Branch nung Chief Manager jenjang tongtetba atema senso-sanger ajak tenüng nung senso mungdang mendendi ajanga tepela lemsateper.

Tulusang Tsüngremi na tarutsü lenmangtem ajak takok nung ania moajangma ta senso-sanger sarasadem.



Sd/-
M. Temjen Jamir
President,
Longjang Senso Mungdang.

Sd/-
Supongsashi
Secretary,
Longjang Senso Mungdang.

PELABA LEMSATEPER

Covid-19 wara agi shiranger anepaluba nung yaritsü asoshi tenla balala agütsürtem dang Health Centre Management Committee (HCMC) Longsa, PHC Longsa, Sub-Centre Moalenden, Sub-Centre Meyilong ajanga pelaba lemsateper.

1. Mr & Mrs. Metsübo Jamir (RD Minister)-i 2 oxygen concentrator, PPE Kit 5 boxes -100 pc, Thermal Scanner -10 pc, Mask (N95) - 1000 pc.
2. Task Force Longsa-i O2 Regulator - 2 nos. & Sintex Water Tank – 1 no. Tsüngremi tetenlar ajak moajangma.

Sd/-
M.O, PHC Longsa

ASTD OFFICE NUNGI PELABA LEMSATEPER

Iba tanububa Covid 19 wara nung shirangertem pei kidang nungi dang Doctor tiyari (consultation) agitsü sapang ka ASTD Office ajanga lapoktsüba sandong ka Tir Yimyim nung agütsüogo aser tanü tashi nüburtem kanga dang ayonga parnok tiyari agia arudagi. Doctor tem nenok kanga dang mazüngi aliba taküm tem süaka asen Aoer meji nenoki nenok senti mapang, sempet aser shisa tajung agi nübur tem yaria arudagi. Iba mapa tajung asoshi nenok dang ASTD office ajanga kanga pelaba lemsateper.

Nüburtem asenok ajaki kodangsa Doctor tem tiyari aginüdir kanga dang awashi meteta parnoki koba mapang agüja ali iba mapang nungji tang aser Covid related atema tang asüngdanga parnok tiyari agitsü mepishia metetdaksür.

Sd/-
Meren Nokpu
Tir, ASTD.

Tarla Joshi alima nungi pilaogo

Mumbai, Aami/June 07, 2021 (Agencies): Senior TV actress Tarla Joshi, shibai 'Ek Hazaron Mein Meri Behna Hai' nung Badi Beeji ama shilem agiba ajaki jangjaa lir, Deobar anepdang la temulungjang agi mapa meinyaki akümba sülen, iba akümlü nungi pilaogo, ta sangdong ka ajanga metetdaksü.

Iba nungtugu show nung Maanvi shilem agila, Nia Sharma-i Joshi asüba osang angashia mangyim tejashi lemsatepogo aser lai ashiba agi, kü 'badi beeji' ka ama teti la bilemtettsü.

"Badi Beeji, na tesünap nung anisüngzü kangma. Tarla ji, 'Badi beeji ka ama onoki na teti bilemtettsü," ta lai lemsatep.

Actor Kushal Tandon-ia Karan Tacker aser Krystle D'Souza tenüng tag süa 'Dadi' nem akümlü agütsü.

Tarla Joshi asüba osang ya actor Anju Mahendroo-i mezüng lemsatepa liasü. Fan club tasüngdangba ka nung telangzüba agütsüba mapang, la asüba osang angashia külem

telok mang ayimer, ta lai lemsatep.

Anju-i, Joshi ya tetsü ka ama teti bilema aser la dak jakla tajung aketba indang lemsatepa liasü. "Tarlaji (Badi Dadi) asüba osang angashia EHMMBH nung adener ajünga mang ayimer. Onoki na kanga menungratsü. Na teti tatem maka tesünap nung anisüngzü kangma," ta lai lemsatep.

Ek Hazaron Mein Meri Behna Hai' dak alaka, Joshi-i show talisa Sarabhai vs Sarabhai aser Bandini nung tongti shilem agiogo. Joshi-i costume designer ka ama la career tenzük aser show dak alia, lai film talisa Gandhi My Father, Ame Pardeshi Paan, Majiyara Haiya aser Hum Jo Keh Na Paaye nung shilem agiba nguogo.

Iba show - Ek Hazaron Mein Meri Behna Hai ya 2011 küm saya aser küm ana tashi takok ngua sayaogo. Iba show nung Tarla Joshi-i Jeevika (Krystle) aser Manvi (Nia) tetsü (great grandmother) ama shilem agiogo.

French Open: Krejckikova aser Gauff na quarter-final-i iogo



Coco Gauff & Barbora Krejckikova

Aami/June 7, 2021 (Agencies): Hombarnü French Open tetsür kija asaya nung Czech Barbora Krejckikova-i taoba mapang iba asayamung final tonga asayar aliba United States tsür Sloane Stephens 6-2, 6-0 agi koka quarterfinals tongogo.

Arishi küm 25 tain Krejckikova-i mezüngbuba set nung Sloane indang serve anaben tashi break asü aser tanabuba set nungbo game ka danga mekokdaksüü asaya akok.

Taoba mapang world number three asayar Stephens, shibai 2018 küm French Open final tonga asayaogo, lai Krejckikova den toktepa

masayatet aser asaya nung unforced errors 26 tashi menaa liasü. Tena tsüingda tang mezüngbuba asayaa liasü.

Krejckikova, shibai 2018 küm Katerina Siniakov den Roland Garros nung tarep asaya kokogo, lai French Open metenzük tsüingda Strasbourg asayamung akokba sülen tang tashi nung khen danga tamakok ngua mali. Suzanne Lenglen court nung Sloane den asaya tetenzük nungi lai amokbanger asaya aser asaya ayog ayonga akok.

La quarter nung America tsür Coco Gauff den asayatsü.

Kasa asayamung tetsür kija asaya round pezübuba nung Coco Gauff-i Hombarnü 6-3 6-

1 aser Tunisia Ons Jabeur kokogo aser tang mezüngbuba Grand Slam ka quarter-final tongtetogo.

Arishi küm 17 tain asayar-i tetenzük nungi asaya amokbanger asaya aser Jabeur nem asaya amokbanger asayatsü atema maongka magütsüü liasü.

Jabeur ya Gauff ama taoba mapang junior French Open champion lir. Asaya nung lai tasa balala benoka asayadang saka Gauff-i aibelen mesüü asayaa liasü.

Gauff-i iba asaya ghonda ka majungdang akok aser la iba asayamung nung tang tashi nung set ka nung danga tamakok mongui asayaa arudar.

IPL final October 15 nü asayatsü asadangdar

Aami/June 7, 2021 (Agencies): BCCI-i, Indian Premier League final October 15 nü asayatsü atema asadangdar. UAE nung September ita tatsük mapang anogo ka nung asaya anana asayaba tajemba kümdaktsüü atema iba sentong ya asadangtepdar.

PTI sangdong ka ajanga taoba mapang asayamung ya September 19 nü tenzüksü aser final October 10 nü asayatsü ta metetdaksüogo, ajisüaka BCCI aser Emirates Cricket Board-i iba asayamung final October 15-i belener aotsü asadangdar.

"September 15 nungi October 15 tashi tazüng lir. Mezüngbo BCCI-i anogo 10 nü asaya anana asayatsü sentong yanglur liasü. Ajisüaka September ita hopta tasembuba aser pezübuba nung anüingdang asaya 10 asayara asayartem kanga belemtsü, kechiyong mapang atsüira," ta BCCI source kati PTI dang ashi.

"Anungji October 15, koba Hokolbarnü aser India aser Dubai nung weekend tenzükba anogo lir, iba anogo nü final ayongzükba asayara fan tem

longsoa arua asaya jangradem reprangtetsü. Iba den anogo ka nung asaya anana asayatsü aliba ya 10 melena 5 mesera 6 dang akümtsü," ta source-i ashi.

Tang BCCI tir Sourav Ganguly, vice-president Rajiv Shukla, acting CEO Hemang Amin, treasurer Arun Dhimal, joint secretary Jayesh George aser IPL mendenbuba Brijesh Patel nung UAE nung oa sentongtem tatembang ka küma renemtepdar.

Emirates Cricket Board ketdangsürtem den senden amenba sülen Secretary Jay Shah bo India-i meyipa aruogo.

Indian team England nung tatembangbuba Test asaya Manchester nung September 14 nü tembangtsü.

Iba sülen tasüingnü IPL nung asayatsü aliba India nung asayartem charter flight ka nung Manchester nungi Dubai-i anir aotsü.

UAE nung parnok anogo asem quarantine asütsü nüingdaker, saka iba ya agintsüa akok, kechiyong parnok UK bio-bubble nungi indang indang arur asütsü.

Busquets dak coronavirus tashidak potetogo

Aami/ June 7, 2021 (Agencies): European Championship atema Spain team renemshiba mapang ka nung Deobarnü captain Sergio Busquets dak coronavirus tashidak potetogo aser pa asayamung tetenzüklen tongtibang asaya kar nung shilem magitetsü akok.

Busquets, anogo 10 nü lokti nungi pila alitsü aser pa European asayamung nung shilem agitetsü magitetsü mejangjai kümogo. Pa June 14 nü Seville yimti nung Sweden den asayatsü aliba asaya nungbo masayatetsü. Group E nung Spain team tanabuba asaya Seville nungsa Poland den June 19 nü asayatsü.

Spain team nung tanungba asayar ka dak danga COVID-19 tashidak mepotet, ta federation-i ashi.

Tashidak potetba sülen Busquets-i Deobarnü Madrid nung training camp toktsürogo, ta Spanish soccer federation-i ashi. Ajsüaka federation-i Busquets temang jenjang indang osang tejanga magütsü. UEFA aser local health safety protocols dak ajemdaker Busquets den ajuruteper alirtem ajak lokti nungi aninogo, ta metetdaksü.

Busquets dak tashidak potetba ajanga tanga national team daka kongshitsü akok, kechiyong pa Hokolbarnü Madrid nung Portugal den warm-up asaya ka nung asayaogo.

Wanda Metropolitan Stadium nung asaya metenzük tsüingda pai Portugal captain Cristiano

Ronaldo den ajuruteper aser tena apangtepa liasü.

Busquets dak tashidak potetba ajanga, Spain atema tatembangbuba warm-up asaya Lithuania den Mongolbarnü asayatsü aliba ya under-21 asayartem den asayatsü.

Tarutsü anogotem nung Spain team nung züingsem 50 shi aliba ajak dang tashidak tendanga alitsü. Federation-isa, Busquets dak sendakba nung kechi jenjang agitsü aji asadangtsü, ta shiogo.

COVID-19 tashidak menatepyonga ora Spain coach Luis Enrique-i squad nung asayartem melenshitetsü. Euro 2020 atema national team shia nem asayar 26 shimtsü atema temelaba agütsür lir ajisüaka Enrique-i pa indang squad nung asayar 24 dang shima lir. Pai ashiba agi, masayatsüpurtem aika pai team nung shimoka mataner.

Euro 2020 atema team maneni renemshiba mapang tashidak nungi jenboa toktsütsü atema personalized practice routines tem benoktsü. Hombarnü agitsü aliba media aser shishilembaba tsütsü inyakyimtem ajak thitsüogo.

Federation-isa, Mongolbarnü Lithuania den asayatsü aliba asaya merprangnera fan tem nem parnoki ticket alir aliba sen meyipa agütsütsü, ta shiogo. Butarque Stadium nung asayatsü aliba asaya asayatsü aliba asaya reprangnerem nem parnoki ticket aliba taa nungi shilem 20 meyiptsütsü, ta Federation-i metetdaksüogo.

Olympic atema hopta 4 tsüingda vaccine tanabuba dose agütsütsü

Aami/June 7, 2021 (Agencies): Olympic nung asayatsü aliba India nung asayartem COVID-19 vaccine mezüngbuba dose agiba sülen hopta pezü lir tanabuba dose agitsü atema Ministry of Health-i latettsüogo, ta Indian Olympic Association (IOA) tir Narinder Batra-i Hombarnü metetdaksüogo.

Kasa osang ya Batra-i national sports federation tem nem metetdaksüogo.

"Tokyo Olympics atema qualify sür aliba asayartem züingoksema aliba NSF tem ajak nem Ministry of Health Government of India-i shiti ka

ajanga Tokyo nung asayatsü pur aser ketdangsürtem ajak vaccine mezüngbuba dose agiba sülen hopta 4 tsüingda tanabuba dose agitsü ta metetdaksüogo," ta Batra-i ashi.

Taoba ita sorkari panel kati, Serum Insititute of India indang Covishield vaccine tanabuba dose hopta 12 nungi 16 tsüingda agitsü metetdaksüogo.

Ajsüaka Bharat Biotech indang Covaxin yabo mezüngbuba aser tanabuba dose tsüingda hopta pezü dang agir.

IOA-i Deobarnü sangdong ka ajanga, asayar 120 aser para-athletes 27 nem vaccine

dose kakabo agütsüogo, ta metetdaksü. IOA-isa, para athletes pezü densema asayar 62 vaccine dose anaprongla agiogo, ta ashi.

Coach aser support staff züingsemtem 114 vaccine mezüngbuba dose agütsüogo aser nisung 37 bo vaccine dose anaprongla agiogo.

Maneni IOA-i, tawa Covid agi shirangba sülen aneper aliba Olympics nung asayatsü aliba asayar pongu dang vaccine mezüngbuba dose takok tashi tekaratiba nung agitsü metetdaksüogo.

Tokyo Olympics ya July 23 nü tenzüksü renemtepdar.



Ranchi nung Jharkhand Olympic Association (JOA)-i ayongzükba camp ka nung asayartem COVID-19 vaccine mezüngbuba dose agiba sülen tangokba noksa nung angur.

BILEMDANGANG

"Ochibo kodanga minbanga meyutetsü."